

武寧縣志卷之五

武寧縣知縣滇南李 珣纂

山川

元黃既剖流峙茫然百昌攸託以植以潛聿昭地利用
畫疆埏豫章壯邑雄峙西偏太平陸鎮三砮水關飛泉
垂綬羣峯插天實產瑰特亦聚真仙靈巖詭石其象萬
千厥美弗耀局鑰惟堅圖經載啟名勝永宣志山川

山 附巖 洞 源

縣治山

印山縣治文廟後翠柏四株教諭彭錫珩植
紗帽山縣治西百步盛文郁讌遊處見古蹟
曹婆洞在印山側世傳有曹婆居此

武寧縣志 卷五

附城山

玉枕山縣北二百八十步其狀如枕為縣治倚負山上有喜
雨亭今廢

獅崖縣東二里崖怪峭若狻猊蹲踞狀為邑城關鎖上有閣
知縣萬友正復建登山臨水之亭以恣遊眺曲磴危闌雲
烟萬態風帆上下睥睨無垠每當晚照諸山翠映襟帶意
境尤佳學人韻士題咏獨盛

法昌山縣西龍潭上宋黃山谷嘗維舟其下見山谷集
登高山縣治河之南二里許昔人佩萸採菊處也前明建浮
屠以補巽峯今僅存兩級

縣西山 以下諸山各分方隅
遠近次第便於觀覽

四望山縣西里許其巔周望四面山水市井烟火歷歷指顧

間爲一邑憑眺勝地有亭曰四望亭宋韓琦李綱兩次修
建知縣王寧慕二公之賢易名曰勿翦詳古蹟

七里山縣西里許峻壁瞰江岌業聳踞巉嶮七里上下隔絕
宋邑進士李宗道闢逕山腰以通往來其磴蜿蟺高縣遠
望如線行人危栗宏治間義俠盛如海子璟璽鑿石山下

平廣可容車馬至今便之乾隆間監生李宗平續修道光
癸未其曾孫旭昇等重修詳村莊條

臥仙岡縣西八里橫枕江干形如仙臥

將軍洞縣西二十里雄瞰修江有英毅之狀

五鳳山縣西二十里自太平脈絡聯蟬而出五山並立如鳳
爲豫右翼僧元印建寺有記

龍鬚洞縣西三十里路徑蜿蟺中有象牙田鐵釜竹凹長凹

武寧縣志

卷五

山

二

四百五十

產茶

洞口有龍峰山禱雨
最靈里人建殿其上

碎石嶺縣西三十里山多碎石

玉屏山縣西四十里在烟港之北方正如屏雙冠山居港南
倚屏而望如雙冠布列然

鐘鼎山縣西四十里太平山麓相傳呂岳遊仙於此有丹崖
宋勅建玉清宮華蓋覆之旁有黃漣洞洞有流月池磊思
潭石室藥臼釀泉泉清甘飲之醺然欲醉洞凡數里多異
蹟

羅屏山卽羅峯縣西四十里危峯突聳矯插雲端登眺其上
萬象森然羅列襟帶間爲西南勝觀自西望羅峯自南望
柳峯秀出人寰邑中可遠見唯此二峯最佳

羅巖在羅峯之麓初入有大堂垂白蓮堂廣數仞高倍之少

進折右得耳臺有雪壁雲田其田廣六尺長九尺中界數十層雲瀾簇湧每界高二寸厚得寸之二濼洞如縐其間空廣寸許有水瑩瑩然凡數十層工緻勻停雖刻畫不能也復入有樓樓下有橋最深達巷巷盡旁有竇水溢出解衣匍匐入有闕有池復闢洞天其妙不可窮云

冰文巖縣西建富象坡上巖門從東入三折而西出有冰裂文深入仅皆明潔可奕可飲中有雪簾又有石如魚如球如耳狀

飲馬岡縣西六十里岳將軍飲馬處見古蹟

石燕巖縣西去澧溪二里許怪石盤空由前門入虛明洞徹玉壁晶瑩乳石懸垂奇詭異狀紆折深通乃從後竇出遂達巖頂遊者品題甚富李大史應熙有詩見藝文

武寧縣志

卷五

山

三

四百六十七

匡山縣西七十里怪石巉巖奇峯翠律上有白羊峯羅漢崖碁枰石雞冠石鷹觜崖諸勝中有風洞投以石聲淵淵如鼓振少頃風發人不能立其下有泉水清冽而甘永久旱不竭

赤岡縣西七十里以色赤故名

鏡臺嶺縣西七十里其上有亭列岫環向

蠶嶺縣西八十里眾山蠶叢綿匝周織烟雲萬狀

龍崖縣西八十里峭壁縣削隱如龍躍下臨木潭其上有紫溜丹硎宛若霞飛

白石山縣西百里白石庵後青崖數十丈浮面一層如凝霜雪世傳許旌陽磨劍傾潑水溜亘古不泯其下即白水溪香萊山縣西百里其山平坦多產香薷一名香薷山

香爐峯縣西百里下臨楊坑泉山環拱世傳仙人煉丹於此
時有白雲繚繞里人占試晴雨屢驗

馬鞍山縣西百里形如馬鞍

九龍峯縣西一百二十里九峯危峻蜿蜒中有福主觀即馬志碑

坑寺晉許旌陽逐蛟駐鳥之所

石鏡山在九龍峯麓嵌空而生石滑而黑與日光相盪則精
氣上升朗如月暈瞬息異狀宋置壽聖院今廢邑舉人盛
元績有記見藝文

七峯縣西百二十里南嶠有七峯森出幽翠可掬

石城山縣西一百六十里延袤如城為武邑諸山綱領

縣西北山

石羊洞縣西北五十里由建富沿溪入洞有村壤溪中有飲

武寧縣志

卷五

山

四

四十五
四百四十五

羊池旁伏石羊復入有峭磴關紐曰巴茅田窮其源凡四
十里至大平山

天河山縣西北五十里山巔有池廣數畝產荷花甚盛無著
和尚結庵於此覆以荷葉曰荷葉庵

果子洞縣北七十里由山磴折入兩旁古木交翳如偃蓋石
縫蒼根橫出若闕內有石室石鍋可玩山產茶榧洞中人
稱榧子為果子故名

遼山縣西北八十里巍然聳立雄據上游為邑巨鎮

太平山縣西北八十里由鐘鼎山旁登山羊腸鳥道二十里

至三仙坡又二十里至太平宮章真人煉丹處旁有鶴山

龜山葫蘆石極高亭前有龍井枯槎溪雲關又有豹齒石

北極山石船龍門孟姥潭獅子巖石人洞諸勝元揭傒斯

遊此有二十二咏見藝文

雲旗山在太平山極高亭陰翠雲縹緲蕩人心目揭曼碩有詩見藝文

三仙岡在大平山腰卽三仙坡相傳三仙集此又梧桐岡皆經揭曼碩遊有詩見藝文

治妝巖縣西北年豐鄉相傳有仙女治妝於此其巖覆石如屋聯以楹簷爲寺前有石人相望曰石人嶺

東延山縣西北九十里山多崕石

九宮山縣西北一百六十里相傳九龍降池中名九宮又云晉安王兄弟九人嘗造九宮於山宋張道清修真處山跨吳楚其陽隸武寧陰隸通山田食仰於寧其中有飛泉如雪溫泉如湯又有三峯撥雲峯龍湫怪松坡試劍石眠雲

武寧縣志

卷五

山

五

四十六
四百一十八

石諸名蹟謝枋得有詩見藝文

陶姚洞九宮山側見古蹟

噴雪崖九宮山瀑布懸流如雪噴激千仞駭目蕩心相傳陶姚二真人飛昇其上

按九宮山脊分水爲吳楚界通志載九宮屬武寧其陰隸湖廣通山縣則宮基尙在武寧今鑿界於韓漚墳云縣北山

金盆嶺縣北里許有嶺團圞如盆上平坦可坐百人遊眺其間可攬一邑之勝

黃牯嶺縣北五里世傳逸人牧黃牛其上

神童山縣北十里周天驥讀書於此舉神童舊建有神童祠天石巖在縣北棠盤由包山左折山陰一洞潛開肘腋廣可

布十席巖脊一罅逗漏天光白晝見烟雲來徂俗呼爲天
竈窟一磴層級遶洞巔如鐵橋然少東支洞旁開隱隱相
望而深特不可測土人張炬討幽約半里許曠衍如平原
垣塹相續冷風倏來一炬將盡遂股栗而還後無有至者
邑人李趣堂有天石賦

天馬山縣北山高倚雲若天馬騰空

雞籠山縣北二十里上有仙人飛劍遺跡舊爲禱雨處

雙嶠山縣北三十里其磴委曲盤雲上有雙峯並峙巖濶浮
翠麓北怪石離立如門爲豫寧後庭鎖鑰側有古樟一株
伊山縣北三十里世傳伊洞湫水泛一卵出大如盃爲逸叟
所得後竟成龍所謂伊洞龍鱖是也事見雜記山產茶與
木瓜

武寧縣志

卷五

山

六

四十七
四百五十八

回頭山縣北五十里俗傳章真人煉丹於此後居太平嘗回
顧此山故名

仙姑洞縣北五十里白羊山麓初伏行數十步忽寬敞有石
屹立少進而右坐石人曰仙姑下橫石臺列小圓石色白
頂縣石鐘旁繞石曰旗傘再進有二井水聲泠泠左右兩
橫洞洞口石人無數其深不知所底

楊新山縣北一百里其山高大抵興國州

石泉洞昇仁鄉洞內五泉並出灌田頗多

宓羲洞上北山與國接壤處縣流千仞崩飛如雪久旱水涸
則作鏗鏘金石仙佩飄飄之音蓋縣北佳境也

翠律峯縣北百里尖秀插天望之如筆

矛岡昇仁鄉中村岡石多奇有石室覆路人行其下旁有石

潭潭深碧隱見其中有門櫺又有石筆石梁石笋石人石獅子怪異陸離又有一石削立如甌甌有口多藏猴又其石多如戈矛故名

獅子巖昇仁鄉當吳楚之界巖口高張有吞吐烟雲狀

天尊山昇仁鄉山勢峩巖氣象尊嚴端正一方如北極然

四面山卽顏嶺山昇仁鄉山無向背四方皆面秀翠可挹爲一鄉之勝其山寺有石平展可坐數十人俗呼曰迎風臺

虎頭山昇仁鄉中村武寧興國州界

黃土嶺縣北一百二十里山色黃有瀑布縣垂如長虹嶺腰有洞深邃不測

北山崖昇仁鄉見雜記

縣東北山

武寧縣志

卷五

山

七

四百十九

磧磯山縣東北源深二十里有磧如階水清且漣又名潔溪青牛峽縣東北三十里峽最奇險夾溪縣崖絕壁道經其下俗名牛頭峽鄉人余尊大余紹高設木柵禦闖賊處今其蹟尙存

青牛洞縣東北三十里世傳有青牛往來爲合威所乘之牛紫鹿嶺縣東北四十里與青牛洞相峙世傳仙人騎紫鹿訪丁令威於此見古蹟

枇杷峯縣東北形勝最佳尹恕有詩見藝文

書堂山縣東北四十里世傳唐張寧隱居讀書於此故名

重巖山縣東北四十里重巖險阻人跡罕到

丫髻山縣東北六十里如雙髻挽雲翠黛蟠空

梅崖山縣東北六十里山高峻泉石洞壑引人入勝山北有

白蓮堂飛來石觀音巖山南有龍隱寺沙溪泉獅子崖響洞石船諸名蹟夏曰瑚有記見藝文

北屏山縣東北六十里高障如屏山頂多沃壤廬烟相望別一村墟

魯溪巖縣東北七十里巖口有石如闕門距丈餘有竇可二三人並入下趨三五級泉漚如沼深尺許涉水以進高廣如屋堂可容百人鬱石盤錯如旗旛華蓋飄飄其上蒼碧間雜蔚如繪畫左折有石如臺上有象如龍如佛又有縣石如鐘叩之鏗然又一石橫亘上有町畦如田蓄水不洩遊者燃火深入循委巷紆行又有田十二區石碁石盃石臼諸象再前則有龍潭淵洞深黝泉水上湧不可復入邑人余長祚張廷藻俱有記見藝文

武寧縣志

卷五

山

八

四百三十三

石佛洞縣東北魯溪山上當窮崖絕壁間嵌空如樓中有怪石如佛象神鬼羅列異狀森出雖巧莫能施也有石叩之如鼓音

馬脊山縣東北七十里與羊腸毗連山多田壤泉水灌注久旱不涸村舍環繞別有景象

羊腸山縣東北九十里盤曲崎嶇與瑞昌興國連界中有山田倚山而居者隨山高下別無邱壑其巔有二大塘俗曰雷公塘雷母塘見池塘類

縣東山

鳳翅山縣東五里狀如鳳飛瞰修水

伏虎山縣東十五里下有古樟陰翳數畝

南臯山一名仙姑山縣東十五里循曲磴上有仙姑庵岷石

嶢刻舊志載下有二塔有古祠相傳爲七仙姑飛昇處旁有井曰汲仙井蓋仙姑搗藥所也

金雞山縣東安樂鄉山上有石望之如雞

遼東山縣東三十里丁令威化鶴遼東卽此山也山下有精靈觀卽丁令威故居觀前有古柏二株別傳爲冀北遼東者誤

大峯山縣東三十里羣峯環拱孤峯岌立其巔常有雲覆

觀風山縣東三十里橫亘如屏其巔平端豁露可以坐觀一邑之風或曰冠床山以其山形高拱岌岌如冠然俗傳仙人玉棺又名冠山

石鏡山縣東三十里石壁平立晶瑩如鏡對之鬚眉畢見石離其壁輒不明故不爲人所取又青牛洞陰有石卧路間

武寧縣志

卷五

山

九

四百五十五

亦明如鏡

晉謝靈運入彭蠡湖口詩曰客遊倦水宿風潮難具論
州島驟迴合圻岸屢崩奔乘月聽哀狖浥露馥芳蓀春
晚綠野秀巖高白雲屯千念集日夜萬感盈朝昏攀蘿
照石鏡牽葉入松門三江事多往九派理空存靈物吝
珍怪異人秘精魂金膏滅明光水碧綴流溫徒作千里
曲絃絕念彌敦按

國朝金壇于光華文選集評註石鏡山在南昌府武寧縣是
康樂亦曾至武矣考集評註俱本地地理今釋一統志諸
書不爲無據或云六臣原註引張僧鑒潯陽記曰石鏡
山東有一圓石如鏡然未確指何地之山或云輿地懸
隔不能越三百里而至此邦且題爲入彭蠡湖口不知

松門在新建距湖口視武較遠又武邑唐以前曾隸九江隸江州康樂好遊無分遐邇命題亦第舉其大概讀詩辭自見今附於此以待後之考古者定焉

望巾嶺縣東巾口之陰相傳丁仙遺巾時里人於此望見之故名

三山縣東四十里邑人邢以忠有三山堂記

墨斗嵯縣東四十五里其形如斗深墨色削立江干

雲蓋山在昇仁鄉宋岳忠武王追賊過此祀於山之龍興寺暇洞縣東六十里洞凡十二門初入軒豁類王侯宅少進得兩洞一左一右右類月有石樓左類秋葉及三進空曠與門不甚類惟兩旁稍約第四門如曲巷左右石樓可猿臂攀引深黝不見天日惟第二門有日光從月洞石樓相射

武寧縣志

卷五

山

十

四百四十五

以後諸門不敢入但聞泉響鏗鏘若遠若近其中景物不勝觀縷大約與曾溪埒邑人張問達有記

吳僑洞縣東六十里昔吳僑煉丹於此

燕巖在箬溪惠民寺後洞凡三門第一門方廣如堂二三門如燕巢故名

盤嶺縣東六十里天將雨山腰必有一線微雲蒸蒸騰上望兩者常於此占焉

縣西南山

柳山縣西南三十里孤峯聳翠卓立如筆巔平淨廣可畝許唐柳渾隱此後人以之名山上有石井書院祠堂湧翠亭宋白玉蟾有亭記又有石門門壁刻詩山腰有觀音閣龍巖佛巖其陰有讀書臺故址其側有小柳山

佛巖柳山之陰巖門有大柱中立岐爲兩戶分入明潔可坐
卧唐柳惟深遊息處旁有龍巖泉自巖出清鑿毛髮

陳坊山縣西南四十里以居人姓得名自柳山讀書臺望之
絕佳上產異草風雨澄之益滋芬芳今從其音爲澄芳山
月山縣西南四十里山峙地平如半鈎月影倒照修江

仙人峯順義鄉雄踞潭上與遼羅柳三峯相望章真人仙處
珠嶺縣西南五十里松林繁蔭綿亘里許時有風濤泛響耐
人傾聽

霧山縣西南五十里俗曰婺山

七里岡縣西南五十里僻徑深邃翠嵐可挹

大乘山縣西南五十里山腰有嵯嵯多竅石峭厲皴透色白
隱隱如雪文人取爲盆玩

武寧縣志

卷五

山

十一

四百六十四

鷺鷥洞縣西南五十里洞陰有羅漢寨基礫尙存

牛皮洞縣西南六十里曰觀音巖中容大溪溪水伏行不測
巖下人以旱率千工鑿竇通水可灌田數百畝

馬山順義鄉綿亘七里澗鳴壁峭上甃石亭有小瀑布有溪
曰瀧溪中多沃壤又有南巖菖蒲嶺桃樹嶺諸勝

觀音崖順義馬山寺側高崖突出如觀音狀面列香爐峯左
右衆山環拱俗呼十八羅漢皆肖

石鐘山縣西南有石如鐘擲石輒鳴

橫堂山縣西南八十里有翠雲寺寺陰有桑釜泉可通僧厨
又有幽磬元鐘鞍岵燕巖疊蓮巖孝烈坡諸勝蹟

疊蓮巖南鄉橫堂山崖石磊疊如蓮瓣濃郁紛披可愛中多
曲室漏明尤爲一鄉遊玩佳處

雷洞縣西南八十里洞中嘗有雷起人不敢入

東山縣西南八十里山多怪石有香爐崖畫眉崖尤佳
銀鑪山縣西南百里形如鑪石多自如銀色故名

鳧堂山南鄉世傳章真人燒煉於此有石垣丹竈遺跡

芳谷巖南鄉北山下初入巖口稍隘折進有小房循逕入得
榻八尺許又紆行數十步至堂堂廣二丈高數倍堂陰有
旁竇由竇口出得小房又折入巷巷盡有梯援梯登石崖
可遠望復入有竈有室不可窮詰其巖靈曲深邃凡數里
皆自下登級而上石壘壘覆嵌空漏明遊者不待執炬而
諸勝自獻云

紅字巖南鄉青林澗巖內有朱染王善二字經久不變

石門山縣西南百二十里斜港源兩山聳崖成門高二丈許

武寧縣志

卷五

山

七

四百二十一

中不相接處止數尺門據要路緣崖而行溪自門出多魚
曰山首魚喜藏石隙

尖嶺縣西南百二十里山當石門之陽形尖如筆上聳雲端
爽氣橫空雅擅諸山之勝

甕嶺山縣西南百二十里其山連峯疊嶂屏峙一方山陰卽
寧州界

大孤山縣西南百四十里孤高險絕

縣南山

羊角山縣南一里溪山窈窕攬一邑全勝盛宗齡有詩

飛鳳山縣南二里以形名上有東林寺

天崙山縣南七里有仙姑菴

將鼓嶺縣南十里相傳盧將軍擊鼓處

武安山縣南二十里元邑人胡紹遠屯兵保障處砦城遺跡
猶存

白鶴岡縣南二十里仙女丁秀英跨鶴上昇處

白鹿岡縣南二十里晉時有白鹿遊其上馴擾不去民以獻
瑞

獅子崖縣南中堡溪旁怪石嶙峋若狻猊狀其草卉鬚鬆如
毛鬣溪中一石卷起圓若毬俗云獅子狎毬邑舉人張應
遴有記見藝文

長岡省志載武寧長岡得神鐘事而武寧山名無稱長岡者
惟縣南二十里一盆鰍山岡綿延數里形勢頗長稱長陵
岡殆卽所謂長岡歟

三卷山縣南二十五里山最高其逕如羊腸曲巷

武寧縣志

卷五

山

三

五十四
四百三十五

樓簷山縣南三十里嚴陽山東峽壁立數十丈下臨深淵一
磴橫亘表里許廣三尺行者如登縣簷惴惴然不敢注視
潘塢山縣南有潘墓故名

石人洞縣南嚴陽山中上下三折中洞一石特立山半肢體
畢具上體色黝腰以下綠白相間儼若人衣帷裳然者洞
尾有石柱高數丈頂橫一石如人掇置者又曰掇石洞其
間鳥道相通約十里崎嶇險仄肩挑者須解重背負而上
里人積金爲會鳩工鑿石越歲始成坦途可容車馬

嚴陽山縣南四十里出入三峽巉岨怪石棧道相通世傳嚴
陽尊者善信結菴於此菴側有泉自石中出如蘄尊者嘗
參龍於此旱可禱雨

石鑊洞縣西南四十里見古蹟

飛洞山縣南四十里世傳盧仙姑飛昇其上有遺鞋石跡
業山縣南四十里山韞美石紫色有鸚鵡眼琢為硯似端溪
山半有邱氏敬承堂義塾邑人鄧敏有記見藝文

半山縣南五十里有危崖縣壓棧道下臨不測險如蜀道
新開嶺縣南六十里下臨溪潭怪石碁列中有獨石如帽曰
紗帽鄒喜陽開鑿建亭其上

河鼓洞縣南七十里峽岬壁立縣瀑數十丈下注深洞轟聲
如鼓俗呼鑼鼓洞洞口有釣磯相傳葛近峰得道於此為里人禱雨之所

澗水崖在南鄉高坪山瀑布縣流如雪約十丈許崖下有黑
泉雨後水驟出如墨俗呼為洗岬水高懿有詩云素齋無
客雲來往百尺飛泉瀉碧湍一時文人多過訪焉

白崖山縣南九十里孤峯嶄然如縣白練內有風洞洞口塵
武寧縣志 卷五 山 四百五十四
氛如掃人不能立

核桃崖南鄉廉村溪中橫亘下流水自石隙出若關紐然其
崖凹凸皺透奇潔可玩

畱雲崖在上南鄉翠律嵯峨與南山並秀其上多雲氣活潑
變幻一名活活崖

朱家山縣南百里接靖安界山路崎嶇旁有溪澗不任車馬
忠武王岳飛斬趙萬於此見岳珂金陀粹編

穀樹嶺縣南百里

大蕘山縣南百餘里山腰有碧虬巖俗呼大蕘洞由石室入
上巖敞明袤延里許又從小石隙度下巖如房屋可棲時
復漏明有崖分二層如樓屋然毗連曰南山有團巖深廣
可容千人其下空洞不測

楊峯在南鄉南山山腰有焦巖綠陰延翠里許人行其中如
遊碧天峯巔有數石小者五六尺大者丈餘墨色叩之有
聲皆可坐

縣東南山

五老峯縣東南十五里五峯聳峙如老丈山腰有雲臺書屋
故址明邑人方孟縉潘儁邢萬策讀書處

晴雨崖在五老峯右巉崖壁立光則雨暗則晴里人試之屢
驗俗呼祈雨崖

高崖縣東南十五里形勢危峻有竇由山麓入仄徑盤紆自
下而上達山腰約里許

大巖縣東南二十五里巖在山半依巖爲寺可容數百人前
後壁立惟左右可通

武寧縣志

卷五

山

五

四百二十四

磨盤嶺縣東南三十里崖石環結周旋如磨

賓陽岡縣東南四十里有摺願亭筠雪樓諸勝見古蹟

西山縣東南三十里遠邇觀眺爽氣襲人

馬首山縣東南三十里昂首江岸俯矚修水有臨流欲渡之
勢

覆鐘山縣東南三十里平疇中突出孤巒巖鎮如覆地之鐘
洞坑山縣東南四十里山巔有坪四高中凹如丹爐泉水不
涸出硤口成瀑布遠觀如練

天柱山縣東南四十里孤峯入雲巍然天半山腰有頭陀寺
長墅源縣東南長樂鄉出麀嶺入雲關有鷹崖飛縣山腰下
瞰曲澗如張翅欲飛狀又有丈人峯靖公崖其崖如怒濤
叠湧最奇者曰危濤峯少進有靖公菴靖公與黃山谷善

時相往復旁有泉甚清甘曰靖公泉菴前有石几可奕其
磴循溪鑿徑關險紆折登降以入旁有石刻內多村田澗
水灌注不涸

仙人巖長墅源之陰曲磴盤雲懸嵯覆之下瞰清溪暑月過
此輒有寒意

馬頸崖長墅源崖盤險隘下湧急流康熙間邑人余文梓敗
白頭兵於此曰擊賊崖

南山縣東南四十里橫列如屏上有煉丹臺丁仙崖每當春
月桃花歷亂芳艷如錦又名桃花峯

鋸齒崖縣東南長樂鄉崖峭如鋸齒時或流雲往復其間若
受鋸然有詩曰石齒何齟齬微雲時吐吞霏霏玉屑下吹
徧桃花源

武寧縣志

卷五

山

六

四百六十五

朱崖長樂鄉南山頂崖色如朱不染霜雪蓋純陽地也

木柿崖長樂鄉一在長墅源一在龍船山側其崖參差層疊
若木柿然柿音費削下木片也

上董源縣東南五十里由仙關沿溪陟磴溪絕石立壁削度
橋紆磴以登及石巷夾壁而入又下磴循澗行有左右橋
乃至觀音崖嵌以閣曰觀音閣崖巔奇峯怪聳其旁有穴
如筩可窺修江閣前有亭由亭旁入皆平磴行半里許曰
仰溪洞兩面崖山林立復入有村落田畝別一洞天又有
魚巖乳巖凡洞內諸峯如笋如筆如瓶如鳥獸如屏奇奧
怪幻萬態莫狀東南山水第一觀也其洞危壁封固不通
人世不知何時始鑿此石巷乃闢其妙云 一名叢雲洞

珠山縣東南五十里控灘東岸平壤特起圓淨如珠雅有臨

流眺遠之勝

白雲山長樂鄉上有黎某手書講經臺三大字其麓有龍棲寺沆瀣泉洗心橋

武陵崖在長樂鄉馮志云有石縫尺許望之隱隱籬落村舍不可入如武陵桃源故名崖踞瓜源上董長墅三源之總滙處端嚴絕特勢如倒筴形家所謂芙蓉障者是也緣崖穿莽而上竟日乃得達其巔約四十里許周迴更強十餘里偏西有雙劍石兩石並聳如插劍高二丈餘有雙扛石形如雞卵大可三人抱亦高二丈隔五尺並峙若比肩而扛者又有寶塔石凡七層廣徑丈以次漸殺及頂而銳如砌塔然其高不下八九丈旁縫中畧生草木如瓔珞青翠可愛絕頂三峯登之可望千里三峯卜諸水泛漫滙爲一

武寧縣志

卷五

山

七

四百九十五

處爲瀑布直下五六丈聲如雷俗名濺水洞其勝致殆不勝言焉

瓜源縣東南八十里由瓜畬口入源口有吳王峯俗傳上有吳王墓循溪過馬鞍石釣橋有石壁刻字多剝落隔溪有釣叟石若蒼顏垂視狀磴盡爲瓜圃乃入村落凡十里及合港分東西源由西源至鳳陽山有仙崖崖右有石笋獨立丈許左有石浮屠累級而上中爲仙閣丁仙嘗於此煉丹少左有仙床長八尺廣殺之斜覆以石平展可卧下有崖如龕構殿其間龕後有石竇前有眠龍坡危臨絕壑不可下眎其麓爲篁山山多竹從白石關入有淨明堂李致菴所居藏書甚富今遺散無復存者又鳳鳴山有西瓜寺東崖上人說法於此嘗踏雪下山攜四侍者行吟步武不

亂人望之如仙東源則經江家橋至橫琴嶺山形似琴橫
一名曬月嶺二源皆深數十里田野繡錯廬烟相望有絃
誦之風獨其源口巉崕峭壁關鎖甚固劈石鉅險乃得通
焉

以上屬修水南

新增

烏風洞在順義鄉馬山陡壁臨流上有石橋橫亘靜坐聽之
寒風凜凜自洞中出

魯巖尖在年豐鄉三十二都界連楚北通邑左有古廟層巒
峻嶺上出重霄有石人石船石轎石雀石獸石甕石屋諸
勝中出藥物爲類甚多

筆架山在順義鄉三十五都諸峯並矗狀如筆架

武寧縣志

卷五

山

六

五十九

四百一十八

黃蓮洞在順義鄉三十五都數峯嶙峋聳出雲表與高洞綿
亘源深十餘里茂林蔭翳余姓樵者皆資之出藥百餘種
黃蓮尤佳故名

駝背山在順義鄉三十八都平空突起望之如老人偃僕狀
轎頂山在順義鄉三十七都危巒萬仞間出小峯一個如轎
頂形

石榴尖在順義鄉三十八都寧武之界如石榴矗立天半
香爐山在順義鄉三十五都槎溪雲峯寺前昂然高聳頂如
香爐每當曉日初晴望之有青烟一段縹緲山巔

東山在南鄉形如屏障綿亘數十里

饒塘峯在南鄉峯下有倒插竹一竿鮮茂異常相傳章真人
到此曰此地有百年柴火無百年香火因折竹一枝倒插

而去

掛榜山在南鄉羅溪狀如懸榜故名

牛襖塘在縣南七十里高峯絕頂中有一窩流泉涌出不涸
不溢四季長清

烟墩在南鄉四十都相傳鄉勇嘗在此舉烽火

石附

龍潭石縣西一里怪石瞰潭清波碧影諸山環映浮黛隱翠
爲文人遊玩之所吟咏甚富石上刻隸書龍潭二大字旁
註曲江謝存理宋建放生亭又有水月亭今廢

合石縣西貞女盛善才塋後一夕風雨兩石自合見古蹟
石室黃婁洞峽內有室長廣如厨可藏書相傳仙人藏經處
又洞口流月池旁有石張口納以碑記銜之若舌然

武寧縣志

卷五

山

六

四百二十七

積雪石羅峯下有石獨立高廣丈許潔白如雪

葫蘆石縣西北大平山宮旁石有葫蘆跡見揭曼碩詩

浴盆石在太平雲關外一石盆天然如鑿澗水自注不溢爲
章真人沐浴處

石船太平山前數里有菖蒲山皺瘦如殼嶺橫石船巨可容
百人首尾昂空相傳章真人所泛

龍門石太平山腰兩崖峙立如門縣尹鄒應元經此嘆爲奇
絕有詩見藝文

試劍石縣西北九宮山宋謝疊山有詩鐫其上

樊噲石縣北二十里伊山港口砥柱溪流逆挽而上相傳有
壯士如樊噲者徙置於此遂名焉

靈臺石昇仁鄉崖山有石臺卽臺爲寺從石磴繞折而上有

泉濺濺自石中出散爲飛雪

文石縣東東渡洲渚間多麗石五色間出大粒小粒磊磊可愛文人選其尤者注清水養盆爲几上異玩有書生得美石琢爲硯絕勝端溪今試之堅潤但類歛耳有金帶者佳仙人石縣東三里旁有沼名青龍沼石上有二足印石黑而跡微白昔有仙人至此觀沼內神龍出沒

巾石縣東巾口丁仙遺巾處見古蹟

破石縣東六十里世傳許遜捕蛟試劍於此見古蹟

以上屬修水北

石鼓縣西南順義鄉有石著山腰如鼓中虛莫測其深投之以石則蓼蓼然又有石鐘相峙世傳鐘鼓並設皆仙人蹟

武寧縣志

卷五

山

九

四百四十三

九條石縣西南百二十里舊傳某兄弟各負其力移置一處數凡九故名其石各重千觔至今尙存

石柱縣西南二百里周廻二百五十步四面削成如柱

雲臺石縣南江陰鄉三卷原霍溪兩水滙合間雙石夾立高丈餘中空處約長九尺廣七尺時有雲氣飛繞水涸時行者多憩於此又旁一石可層級上狀若梯俗呼天梯石

試力石縣南球場有石大如堂高五六丈鄉人多於其下縱石較力

石櫝巖陽山內有崖如人獨立旁有石櫝方正腰露一痕若上下函者其櫝橫置石柱上若柄擎然相傳櫝中有仙經沕石南鄉龜山下溪中有石磊磊皆白色離奇變幻萬態畢具如鏤繪然

流雲石南鄉織女崖下有斜石壁水縈旋變幻如流白雲
三官石縣東南十五里石臨溪旁平展可布席昔傳有三官
讌飲於此故名

老蛤石縣東南二十五里修水中崖石纍纍若蝦蟆羣集狀
土人呼蝦蟆爲老蛤故名又其間一石如鼓春夏時暴水
衝擊逢逢有聲

獅石長樂鄉西山巔面長壑源石勢危聳

石坪長樂鄉西山之陽環坪梧桂白石交錯深秋花發落葉
紛飛清香襲人又曰梧桂林見古蹟

將軍柱長樂鄉南山屹立如柱睥睨重巖

占雨石上董源口每築堰水浸石半有小雨其年不旱

龍船石上董源口高橫山上又南鄉有石船平展可坐百人

武寧縣志

卷五

山

三

四百六十五

鳳凰石瓜源仙崖絕頂聳立數丈如鳳之欲翔者

以上屬修水南

按縣北山自寧州黃龍山過九宮太平逶迤數十里聳
鷹嘴崖至玉枕山爲縣治其大幹則由昇仁分水均過
黃墩起北崖歷瑞昌德安以達於匡廬縣南自寧州毛
竹山過朱家山由武陵崖以達於雲居此南北大勢也
其餘諸山又別爲支分側出舊志載山之脈絡紛亂不
合如鐘鼎在太平之麓乃云自九宮過鐘鼎太平一誤
也伊山五鳳皆自太平分也七里山又分於伊山不可
越五鳳乃云西界分山爲伊山越七里又越五鳳二誤
也武陵山在東南混入東北與丫髻連三誤也大孤不
自銀爐分四誤也其他舛謬尤多今悉汰云

舊志

水

修水源流

修水源出寧州黃龍山流經州治至縣南過建昌達彭蠡以其修遠故名郭璞志曰有水名修有魚名儵天下遙邈此地無憂酈氏水經注曰循水出艾縣而東北經豫寧縣故西安也晉太康元年更從今名循水又東北注於贛其水總納十川同靈帝中平二年立循水又東北注於贛其水總納十川同湊一瀆俱注於彭蠡也按漢地理志豫章艾縣有修水東北入湖又晉書太康有永修縣此註作循譌也永修以修水名蓋自漢中平已立所謂更從今者豫寧縣名也據云東北逕豫寧縣又東北逕永修則豫寧當在寧州武寧之間永修在建昌武寧之間矣修水清潔灘潭明碧可鑒唐

武寧縣志

卷五

川

五

五百四十七

王周詩曰細草濃藍潑輕烟匹練拖邑人盛謨有修水曲附通志修水源流

寧州修水出黃龍山與湖廣通城縣連界水行修遠故曰

修江受杏宛水

出幕阜山亦連通城

百菖水

出大湖山

武寧鄉水

出大瀉山連湖

廣潯陽興國州及新昌界

東津水

出州南東津山

洪水灘水

灌毛嶺下田三十頃

鹿源水

腰帶水

出鳳山

過州城東受安平水

出毛竹山

鶴源水

出湖廣連界九宮山

及泰安鄉劍口梁溪諸水東北流經武寧縣南合義溪水

官塘源港

亦名腰帶水出小洞山

魯溪水南受清江

出銀爐山

長田

楊浦石鏡

出嚴陽山

鳳口

出三卷山

北受茶培

出伊山

東北受陂田

仁箬溪

出了山

東受磧溪

出雙嶠山

諸港水東北流

以上皆靖安武寧水

城西雙溪水出毛竹山

與寧州界

一支歷南源諸都東北流達

於追里一支歷中下礫坑達於桐城合流受桃源水

出九洞南

流石掌灘水東南流抵奉新與馮水合出邑南百丈山龍溪水出藥

王華林水出華山縈紆西來入之而皆會於修水安義之龍

江水兆州水東陽新徑水合於邑東為三合水并皎源出寶

峯白武斛源二水俱出靖安界諸水東流合於修水又東北流經

建昌縣南合檀陂水雲居山之楓林西江白沙雲門諸水

東流入之又合珠溪水一名青楓灣漢元和間出明月珠

大如雞子即此達於章江匯於彭蠡星子六溪十八湖之

水入之德安博陽川東南流入之又北為女兒港德化水

入之港口白沙水積初日照之燦然金色曰金沙洲明師

殲陳友諒之卒於洲上是為西鄱湖

按贛水盱水修水合注彭蠡以達於江蓋江西三大水

也修水清潔與贛水匯處黃碧分流清濁犁然武邑為

武寧縣志

卷五

川

三

五百二十七

修水正流奉新靖安安義皆別流支水會合修水也至

武寧水道位次通志所載多不合如官塘源港附縣西

北在茶培港之下魯溪居縣東北七十里由陂田入修

水清江在縣西南八十里積溪居縣東北在陂田箬溪

之上長田楊浦又在官塘港上據水所經當云東北流

南受清江長田北受茶培經武寧縣東受積溪東北受

陂田箬溪諸水又清江水當云出瀧溪白石源箬溪水

當云出丫髻楊梅諸山姑附於此以待釐正又靖安奉

新安義三縣水合稱僚水與修水合於建昌縣下二十

里之山下渡省志乃云靖安諸水合修水流經建昌縣

南則是二水合於縣上矣亦屬錯誤當云靖安諸水至

山下渡合於修水經吳山匯於彭蠡也

縣治水

鶴溪水

舊志作腰帶水

縣治南三十步自官塘源流入城中歷卧象

冠蓋看鶴等橋流入修水

縣西水

南茶水縣西一百三十里源出小流黃鵠礫坑西南流出寧

州境內入修水

木潭水縣西源出石城南嶠九宮大岡諸山匯陳橋港船頭

灘桑田港遼田港諸水入修水

澧溪水縣西六十里源出果子洞大源洞入修水

下絃水縣西四十里源出太平山經煙港入修水

西渡水縣西七里源出伊山入修水

縣東水

武寧縣志

卷五

川

三

三百九十七

東溪水

舊志作磧溪水誤

縣東門外源出雙嶠山由北透迤而南達

東門循城而西復南轉入修水今已失其故道詳見水利

志

邑增生劉翔龍監生劉金誥兄弟捐修溪東上下石堤各廿五丈中費小石土堤卅六丈費錢四百五十緡零

羅步水縣東二十里源出磧溪南臯合於雙港流入修水

曉港水縣東三十里源出魯溪雙溪青溪諸山合陂田水入

修水

大橋灣水縣東三十五里源出社林石鏡入修水

箬溪水縣東六十里源出楊梅丫髻山入修水

新陂水縣東六十里源出南園繞太公山入修水

灰埠水縣東七十里源出磨刀嶺入修水

以上修水北

縣西南水

洋湖水縣西南九十里源出寧州桃花坳入修水

清江水縣西南八十里源出瀧溪白石源由馬山繞龍石至坪下入修水

長田水縣西南五十里源出牛皮洞入修水

白石港水縣西南四十里源出大湖塘經小流會斜港入修水

修醴水縣西四十里源出大孤山入修水

按舊志載白石港源出小流斜港又云修醴水源出大孤山大孤載縣西南稽縣西南四十里舍白石別無有港何得分為二水若以修醴出大孤別有水名不應云縣西四十里今姑並錄以待考正

鄧埠水縣西南三十里源出球場入修水

武寧縣志

卷五

川

三

六十五
四百〇五字

石塘下水縣西南源出洋港入修水

楊浦水縣西南二里源出朱家山巖陽山入修水

縣東南水

鳳口水縣東南七里源出石規三卷匯薊田入修水通志誤載縣北

澆洲水縣東南十里源出梅壠艾壠泉口匯尙書橋入修水

長沙水縣東南二十里源出南冲洞經渡溪董家洞經東邊

堰匯雙港入修水

潭埠水縣東南三十里源出東源入修水

楮橋水縣東四十里源出西山入修水

中潢水縣東南五十里源出上董源入修水

蜈蚣渚水縣東南五十里源出長墅源入修水

三碛水縣東南六十里源出瓜源仙壇源入修水

以上修水南

前所紀皆水之源流馮志混載諸港今訂入水類其有溪港在村落舊志已登者另列一類

中村水源東出天尊山西出顏嶺山合流北出與國州龍港按武寧諸水唯昇仁鄉中村之水北流與國州又箬田雙河之水西流與國州不入修水特附紀之

溪港

義溪縣西百里源出西港昔有周姓者七世同居故名

櫻田港縣西七十里源出太平山水文披拂如縈纓然

煙港縣西四十里源出石羊洞羅坪春漲則烟水迷離萬狀

龍須港縣西三十里源出鐵矢窩象牙田合煙港至下絃

茶培港縣西十五里源出伊洞由山口又會小洞山水至羅

武寧縣志

卷五

川

三

六十六
三百九十字

堰西渡

瀧溪縣西南八十里源出桃樹均由荷堰迄馬山水文細緻綺波縈迴里人稱為秀水嘉慶二十四年荷堰劉姓建一

浮屠

枯槎溪太平宮前荒州若槎春水漲則泛下雲關揭曼碩有詩

官塘源港源出天竈窟自西水關入城由看鶴亭出東關入修水

梧榕溪縣北十里源出神童山周天驥讀書時有梧榕落晚溪句故名

魯溪縣東北七十里水出堰坪相傳魯真人修煉其上溪東山上有塔

清溪縣東北昇仁鄉水清潔可愛月映如鏡又清溪巖寒草木猶青

以上修水北

斜港縣南九十里源出大蕘山下有織女崖崖臨溪溪中有浣絲盆盆下有纜繭釜水縈迴擾宕如纜絲然旁縣大小銀釘若相照者又有流雲石如白雲流轉皆奇勝

瓶溪縣南八十里其溪清流瀉注如引甌然瓶水直趨鑼鼓洞異響交作相傳爲仙人飲酒樂云

羅溪縣南六十里有象眼石梭石風蕩其際水石相織如羅文可玩近有拾溪石琢爲硯者色紫紺質甚堅但拒墨耳白石港陳坊山口中多白石磊磊如星

石鑊港縣南五十里源出巖陽山至楊浦與龍潭相望映帶

武寧縣志

卷五

川

三

三百十字

自佳

得月港縣東南三十里源出長墅源至蜈蚣渚林石綺麗得月最幽

迴溪縣東南溪水縈迴崖石盤折波文縠縐可以流觴

以上修水南

按武寧諸水以類詳源流凡與修水會而其中有事跡形勝可紀者皆載入溪類馮志混載諸港至如茶培港官塘港之在村落而無事蹟形勝亦循馮志所編存之云爾

灘

縣西二里曰張家灘十里曰梅瀾灘水瀾簇簇如梅花二十里曰秤勾灘環曲如勾又曰惡瀨灘三十里曰抖擻灘水

勢抖擻三十五里曰新灘唐景雲中遷新縣處四十里曰
蕪灘四十五里曰牛鼓灘水鳴如鼓五十里曰蘆陂灘五
十五里曰渠梁灘又有仙人潭孔沸灘激浪如沸七十里
曰高灘又曰澧溪灘八十里曰桃林灘九十里曰影灘又
有三斗灘新開灘百里曰瘦狗灘多瘦石又曰斜石灘凡
十七灘
在縣上

縣東一里曰東渡灘五里曰楊柳灘七里曰鳳口灘十里曰
鹿角灘岐石嶙峋見韓子蒼詩又有豬頭灘蒼石昂立二
十里曰徐灘二十五里曰西灘灘下有石鼓潭三十里曰
車頭灘石如轆轤又有病灘三十五里曰瀦石曲水石縈
迴渦蕩四十里曰羊腸灘紆折如羊腸下有墨斗潭五十
里曰控灘六十里曰鷺鷥灘水石潔白又有松樹演破石

武寧縣志 卷五 川 三 四百四十九

潭八十里曰三碕灘怪石橫布水中俗呼爲和尚石勢最
險急凡一十四
灘在縣下

潭

龍潭縣西一里潭水幽碧上有盤石立小浮屠見古蹟

磊思潭縣西四十里黃漉洞內石龕覆其上清碧可浴旁有
石刻

狀尾潭縣西四十五里潭水澄湛貢生熊鎮瀾有詩曰灘頭
蜃氣接晴嵐地盡龍沙沃水涵濁浪排空舟楫穩一輪明
月照澄潭

長田潭縣西南五十里淵深難測

仙人潭縣西六十里潭上有壁壁上有二仙人跡

孟姥潭縣西北太平山龍門旁有石覆其上水自懸崖流如

瀑布注潭深碧不測

節婦潭縣南一里相傳戴復古妻投水處有辨詳古蹟

石竈潭縣南五十里潭底有大石竈藏魚漁者從石穴屈曲入竈驅魚從竈門出其門徑圍二尺如圭竇直上其曲僅可容一人入

石鼓潭縣東二十里有石如鼓縣修水上潭最深藏龜

大陂潭縣東三十里水碧如苔邑人余弼有詩見藝文

紅巖潭縣東三十里瀦昇仁鄉東西兩河水深不可測東有紅崖橫亘數十丈水勢至此一曲而西

菖蒲潭縣東四十里長墅源潭有三坎菖蒲環之清香襲人相傳靖公品茶於此又名其地爲茶瓶澗

下澗潭縣東五十里

武寧縣志

卷五

川

天

四百五十五

龍腹潭縣東六十五里其水澄湛十餘里碧淨縈迴爲一邑大瀦蓄處

洲浦 附瀦

縣西南二里有楊浦岸多楊柳晚照最佳十二里有費家洲洲多美石十五里有饒灣修水縈迴環抱形勢絕佳西北七十里有石燕洲洲在燕巖前甚廣沃西七十里有團洲洲團如月春泛自妍西南八十里有清江浦舊名義浦臨修水平遠清曠兩岸相對溪山秀媚邑勝景也

以上屬縣

縣南一里有湫洲在東渡節婦潭之間長里許春漲秋月最佳形如白鷺洲可闢堂閣齋舍爲修水大觀東二里有孟家灣相傳古有店市直達鶴橋十里有漉洲五十里有鱖魚洲在墨斗山下水平則見如魚形又其間多鱖魚五十

五里有斜月灣在涇灘下潭水深碧灣曲如新月之未絃者故名

以上屬縣下新州

詳見雜記

寒泉井縣治左花園裏見寒泉樓古蹟

芙蓉池鄭子通草堂之池芙蓉甚盛時有鴛鴦照水黃山谷

過訪詩曰鴛鴦終日愛水鏡苗菑晚風凋舞衣

縣井在縣治左儀門外久廢又一井在王夫人廟前

北井在縣治北張鎮臣鑿

分司井縣治左舊按察分司門外今存

司前井縣治左舊布政分司側石床有咸淳癸酉清明日建

八字今廢

下清井縣治左舊朝元宮內

武寧縣志

卷五

川

完

三百九十四

孝子井縣治右今儒學門內明教諭朱璣鑿以養親名孝子

井泉水清潔道光癸未監生盛學烹重修

泮水井縣治右舊為儒學今廢

甘羅井縣治右見古蹟

以上在縣城內

東湖塘縣西二十里塘長二里澄碧可泛舟月白風清綺波

徐興宛然有東湖之勝

釀泉縣西鐘鼎山旁黃漣釀酒處人飲其泉輒有醉意又有

流月池在黃漣洞口形如偃月水自崖注流晶光縈蕩又

丹井為呂巖煉丹處見古蹟

飲羊池縣西建富洞內池廣二三十圍受水數百斛四時清

碧不涸周有白痕一線環之池旁石皆怪麗昔傳仙人牧

羊引飲於此其羊化爲石蹲伏池口

龍井縣西北太平宮左龜山前又虎跑泉在太平山相傳仙人鞭虎虎伏不能起溢而爲泉一名鹿跑泉揭曼碩有詩見藝文

龍泓泉年豐鄉小九宮寺後泉水清潔僧常以竹規引水入厨泉側崖上有龍泓二大字旁鐫宋謝枋得題五小字

金蟾泉縣西北一百三十里黃柏寺側山泉清冽鑑毫髮僧以竹引之達於香積其流蔭山田數畝出頓石下邑合萬友正憩此徘徊泉下忽見金蟾浮出俄頃卽逝遂名斯泉以誌其異萬令碑今藏寺內

石壁泉年豐鄉縣崖壁立峻險如削下有小巖清泉澄澄流沒山中不知其處崖上橫鐫石壁泉三字

武寧縣志

卷五

川

三

四百三十三

苦竹泉縣北九十里

黃土泉縣北泉流爲瀑布飛雪濺珠爛然異觀

甘泉縣東北昇仁鄉昔許旌陽捕蛟其徒甘戰插劍於此湧泉甚甘又曰卓劍泉見古蹟

上泉縣東北六十里利灌溉

分水泉縣東北七十里舊志載其水西流七十里至湖廣興國州入陽新河

魯溪泉源出巖內龍潭淵深不測至巖口滙爲沼入溪

雷塘縣東北羊腸山頂有二塘俗呼爲公母塘其母塘尤廣水深碧不涸有魚大者長五六尺時或出遊人不敢取

大泉縣東北北屏山灌田極多泉上下二石巖嵌空而起雨後瀑布數十丈

青龍沼縣東三里廣六畝許世傳有青龍出沒於沼其旁石上有二足跡爲仙人觀龍處

湧泉縣東安樂鄉天晦則水上湧旁有寺亦曰湧泉

仰天塘縣東六十里蟠山絕頂廣四畝水澄澈可鑒毛髮莫測其深中有魚首尾如龍然不常見

劍池縣東井壠世傳許遜磨劍處

以上屬修水北

大湖塘上南鄉大湖山上周數十畝經冬不涸

廉村井南鄉廉村葉進士所鑿

溫泉縣南大蕘山斜港內泉有釜初釜長而狹水自縱橫石孔出氣蒸如霧銳熱不可探指第二釜圓周四尺許第三釜稍廣其氣少殺而深處亦難注手二三釜之下有石盆

武寧縣志

卷五

川

三

四百四十三

可坐五六人濯足凡三釜皆澄潔其水澣衣垢能盡煮雞卵能熟土人往擣雞彘於初釜旁多積毛雖盛暑無穢氣又年豐鄉道院有溫泉如沸鑿石爲方塘二澣濯者不輟殷胡塘一名殷鄔塘在順義鄉長二里廣數丈相傳古有殷鄔二大族居此沈陷爲塘或曰鸚鵡塘

貞公井在柳山柳渾所鑿故從其謚以爲名

石鑊泉縣南四十里見古蹟

虎爪泉下南鄉有石痕如虎爪泉出其中甚甘

鳳凰塘縣南五十里山巔有塘廣數畝塘中峙一小山恍若蓬島之勝相傳有異蛇大如斗人不敢到

石鍋泉縣東南石壁山頭高千尺壁峭崖縣崖下有石鍋徑三尺許水自鍋中沸湧而出灌田數百畝極旱不涸

靖公井長樂鄉靖公庵前見古蹟

午河縣東南賓陽岡余弼鑿

石湖塘縣東南六十里方廣里許多魚鯽爲最每春夏或罾或釣兩岸如堵有泛舟者乘筏者楊柳風生波翻魚躍使遊者意趣駘宕

井沼在桃花峯世傳丁仙所鑿

以上修水南

按馮志山水一門缺畧甚多廢本收拾廣矣又於形勝可采潤綴數語山水之靈頗堪一慰但方位多淆雜名目多更張令觀者不知所指今訪諸鄉里參閱馮令舊稿畧爲校正首印山紗帽鶴溪城內井者主縣治也界以修水者分南北也山則四面自近而遠別道里也水

武寧縣志

卷五

泉井

三

七百七

則兩岸由上而下溯源流也溪港外附潭泉井中附池塘洲浦中附灣各依次編列闕者補之複者刪之舊名須沿者沿之間有新名熟習宜並存者仍以舊名爲冠庶使不沒其實至陰崖窮谷耳目不周攷核未確尙有望於後之釐正云

梁志